



GIG  
CYMRU  
NHS  
WALES

Iechyd Cyhoeddus  
Cymru  
Public Health  
Wales

# Adroddiad Blynyddol 2022-2023

## Y Rhaglen Gwên am Byth

**Awdur:** Tîm Deintyddol Iechyd Cyhoeddus  
Is-adran Gofal Sylfaenol, Iechyd Cyhoeddus Cymru

**Dyddiad:** Mehefin 2023 **Fersiwn:** 1

**Dosbarthiad:**

Prif Swyddog Deintyddol, Llywodraeth Cymru  
Cyfarwyddwyr Clinigol, Gwasanaethau Deintyddol Cymunedol GIG Cymru

**Pwrpas y Ddogfen a Chrynodeb ohoni:** Mae'r ddogfen hon yn casglu adroddiadau o weithgareddau sy'n gysylltiedig â'r rhaglen Gwên am Byth, a gynhaliwyd gan y Gwasanaethau Deintyddol Cymunedol yn y saith Bwrdd Iechyd Lleol yng Nghymru. Y cyfnod adrodd yw 1 Ebrill 2022 i 31 Mawrth 2023.

**Diolchiadau:** Diolch i staff y Gwên Am Byth a gyflwynodd yr adroddiadau lleol.



## 1. Cyflwyniad

Rhaglen genedlaethol i wella iechyd y geg yw Gwên am Byth a ddarperir gan Wasanaethau Deintyddol Cymunedol Cymru a'i brif nod yw gwella iechyd a hylendid y geg ymhlith pobl hŷn sy'n byw mewn cartrefi gofal. Cyflwynir y rhaglen mewn partneriaeth â staff cartrefi gofal a nyrsio a'r gweithwyr gofal iechyd a gofal cymdeithasol ehangach. Caiff ei hategu gan Gylchlythyr Iechyd Cymru 2015/001 a chanllawiau NICE [NG48].

Nodau hanfodol y rhaglen yw sicrhau bod:-

- polisi cyfredol ar waith ar gyfer gofal y geg ym mhob cartref gofal;
- staff wedi cael hyfforddiant mewn gofal y geg (gan gynnwys mewn sesiynau cynefino) a bod y cartref yn cadw cofrestr hyfforddiant;
- preswylwyr yn cael asesiad gofal y geg ar adegau priodol er mwyn canfod unrhyw newidiadau a fydd yn effeithio ar iechyd y geg;
- yr asesiad yn arwain at gynllun gofal unigol, sydd wedi'i gynllunio i sicrhau hylendid y geg da sy'n cael ei adolygu'n rheolaidd; a
- bod cartrefi gofal yn ymwybodol o sut i sicrhau bod gofal a thriniaeth ddeintyddol briodol ar gael pan fo angen.

Mae enghraifft o bolisi gofal iechyd y geg, a'r asesiad a argymhellir ar gyfer gofal y geg a'r cynllun gofal y geg ar gael yn: <https://icc.gig.cymru/gwasanaethau-a-thimau/iechyd-cyhoeddus-deintyddol/gwella-iechyd-y-geg/gwen-am-byth/>

Datblygwyd pecyn amgen Hanfodion Gwên am Byth yn 2021 er mwyn galluogi dull wedi'i symleiddio i gynnig a chyflawni nodau'r rhaglen i bob cartref gofal ac i ddarparwyr gofal eraill, er enghraifft gwasanaethau gofal cartref.

**Yn 2022-23, cymerodd 404 o gartrefi gofal a chartrefi nyrsio i oedolion hŷn ran yn Gwên am Byth. Darparodd y Gwasanaethau Deintyddol Cymunedol 1,168 o sesiynau hyfforddi a chynhaliwyd 594 o ymweliadau sicrhau ansawdd.**

## 2. Cwmpas

Y Cartrefi Gofal sy'n gymwys i gymryd rhan yn Gwên am Byth yw cartrefi nyrsio a chartrefi preswyl i bobl hŷn yn bennaf (gan gynnwys y rhai ar gyfer pobl sy'n byw gyda dementia). Fodd bynnag, cydnabyddir y gallai pobl hŷn fod yn byw mewn cartrefi sy'n gofalu am grwpiau oedran cymysg. Gallai timau Gwasanaethau Deintyddol Cymunedol (GDC) benderfynu cynnwys y cartrefi hyn os oes ganddynt y capasiti a'r adnoddau i wneud hynny.

| <b>Tabl 1: Cwmpas</b>                 |                                     |                                                                     |                                                      |
|---------------------------------------|-------------------------------------|---------------------------------------------------------------------|------------------------------------------------------|
| Bwrdd Iechyd Lleol                    | Nifer y cartrefi ym mis Mawrth 2023 | Cyfanswm y cartrefi gofal cymwys yn y rhanbarth ar 31ain March 2023 | Y ganran o gartrefi sy'n cymryd rhan yn Gwên am Byth |
| Aneurin Bevan                         | 85                                  | 92                                                                  | 92%                                                  |
| Bae Abertawe/<br>Swansea Bay          | 80                                  | 80                                                                  | 100%                                                 |
| Betsi Cadwaladr                       | 109                                 | 170                                                                 | 64%                                                  |
| Cwm Taf Morgannwg                     | 56                                  | 65                                                                  | 86%                                                  |
| Caerdydd a'r Fro/<br>Cardiff and Vale | 17                                  | 62                                                                  | 27%                                                  |
| Hywel Dda                             | 44                                  | 89                                                                  | 49%                                                  |
| Powys                                 | 13                                  | 31                                                                  | 42%                                                  |

Datganodd y Byrddau Iechyd Lleol fod llawer o gartrefi wedi cau yn ystod y cyfnod adrodd hwn. Priodolwyd hyn i bwysau ariannol a phwysau o ran darparu gwasanaethau. Fodd bynnag, o gymharu â 2021/22, gwelwyd mwy o frwdfrydedd tuag at y rhaglen a mwy o ymgysylltiad gan gartrefi.

Dywedodd tîm Aneurin Bevan ei bod yn ymddangos bod y rhaglen Gwên am Byth wedi bwrw gwreiddiau yn y cartrefi gofal sy'n cymryd rhan ynddi, er gwaethaf y trosiant uchel o staff gofal a rheolwyr cartrefi gofal.

Esboniodd tîm Caerdydd a'r Fro ei bod wedi bod yn flwyddyn anodd a'u bod wedi cael anhawster i ailymgysylltu â chartrefi gofal yn dilyn y pandemig COVID-19 a'r cyfnod ad-drefnu, a bod hyn wedi'i adlewyrchu yn y ffigurau gweithgarwch. Mae wedi ad-drefnu ac wedi cyflwyno dull gweithredu newydd o fis Ebrill 2023, sydd eisoes yn dangos arwyddion o lwyddiant.

Mae tîm Hywel Dda wedi ymdrechu i gydnabod a pharchu'r anawsterau a wynebwyd gan reolwyr cartrefi gofal. Mae hyn wedi helpu i feithrin cydberthnasau cydweithredol gwell ac ailymgysylltia, a gwelwyd y rhaglen Gwên am Byth yn dychwelyd yn raddol.

Dywedodd tîm Powys bod Pecyn Hanfodion Gwên am Byth wedi bod yn hollbwysig er mwyn sicrhau cyfranogiad gan gartrefi a oedd o'r farn y byddai'r pecyn Gwên am Byth yn ormod iddynt. Mae'r tîm yn adolygu cynnydd cartrefi gofal yn rheolaidd ac mae'n falch o fod wedi cynorthwyo dau gartref gofal i symud ymlaen o becyn Hanfodion Gwên am Byth i becyn llawn Gwên am Byth. Mae dau gartref gofal a oedd wedi gwrthod y cynnig i gymryd rhan yn y rhaglen wedi cysylltu â'r tîm hefyd, yn datgan eu bod yn dymuno ymuno â'r rhaglen.

### 3. Hyfforddiant

Cynlluniwyd yr hyfforddiant yn bennaf i sicrhau bod staff cartrefi gofal yn deall:

- y rhesymau sylfaenol dros iechyd y geg
- y risgiau sy'n gysylltiedig â gofal y geg gwael
- gwerth asesiad risg (a sut i gynnal yr asesiad os ydynt wedi'u hyfforddi a'u cofrestru)
- pwysigrwydd cynllun gofal
- yr angen i gyflawni'r cynllun gofal yn unol â'r cyfarwyddiadau a defnyddio'r adnoddau cywir
- pwysigrwydd cofnodi'r broses o gyflawni cynlluniau gofal ac unrhyw resymau dros beidio â gwneud hynny.

Trefnir yr hyfforddiant gyda thîm lleol Gwên am Byth. Mae'n bosibl y bydd y tîm yn hyfforddi pob aelod o staff sy'n darparu gofal personol mewn cartref gofal, neu efallai y bydd yn hyfforddi hyrwyddwyr enwebedig gofal y geg mewn cartref gofal, a fydd yn cael cael cymorth i hyfforddi eu cydweithwyr.

| <b>Table 2: Y ddarpariaeth hyfforddiant</b> |                                                                                       |                                                                                                                             |
|---------------------------------------------|---------------------------------------------------------------------------------------|-----------------------------------------------------------------------------------------------------------------------------|
| Bwrdd Iechyd Lleol                          | Cyfanswm y sesiynau hyfforddiant a gyflawnwyd gan y Gwasanaethau Deintyddol Cymunedol | Nifer yr aelodau o staff cartrefi gofal sydd wedi mynychu hyfforddiant a gyflawnwyd gan y Gwasanaethau Deintyddol Cymunedol |
| Aneurin Bevan                               | 240                                                                                   | 912                                                                                                                         |
| Bae Abertawe/<br>Swansea Bay                | 92                                                                                    | 412                                                                                                                         |
| Betsi Cadwaladr                             | 574                                                                                   | 2217                                                                                                                        |
| Cwm Taf Morgannwg                           | 23                                                                                    | 119                                                                                                                         |
| Caerdydd a'r Fro/<br>Cardiff and Vale       | 72                                                                                    | 158                                                                                                                         |
| Hywel Dda                                   | 126                                                                                   | 568                                                                                                                         |
| Powys                                       | 41                                                                                    | 250                                                                                                                         |

#### Aneurin Bevan

Mae sesiynau hyfforddi sy'n cael eu canslo'n hwyr gan gartrefi gofal yn heriol. Profwyd lefelau uchel o drosiant staff ym mhob sector gan gynnwys: colli llawer o staff cartrefi gofal sydd wedi'u hyfforddi mewn gofal y geg; colli nifer o hyrwyddwyr gofal y geg sydd wedi'u hyfforddi gan dîm Gwên am Byth; colli rheolwyr sefydledig a phrofiadol cartrefi gofal a oedd wedi mabwysiadu Gwên am Byth yn eu cartrefi gofal.

#### Bae Abertawe

Cafodd nifer fawr o sesiynau hyfforddi eu canslo (57 gan gartrefi gofal a 15 gan dîm Gwên am Byth y GDC). O blith y 412 aelod o staff cartrefi gofal a gafodd hyfforddiant yn y cyfnod hwn, cafodd 106 ohonynt hyfforddiant i fod yn hyrwyddwr gofal y geg. Mae hyn wedi golygu bod 131 o aelodau o staff wedi'u hyfforddi gan hyrwyddwyr yn ystod hyfforddiant sefydlu. O blith yr cartrefi hynny sy'n cymryd rhan yn Gwên am Byth, mae 23 o'r cartrefi gofal yn defnyddio asesiadau risg a chynlluniau gofal electronig.

### Betsi Cadwaladr

Ers y pandemig COVID-19, mae cartrefi gofal wedi bod yn fwy parod i dderbyn newidiadau i'r ffordd y mae rhaglenni'n cael eu darparu. Maent yn fodlon addasu i ddarparu hyfforddiant ar-lein i'r aelodau o staff hynny na allant fynychu sesiynau wyneb yn wyneb traddodiadol oherwydd sifftiau nos neu wyliau. Cyfeiriwyd yn benodol at staffio fel mater allweddol, sydd wedi golygu mwy o barodrwydd i dderbyn dull gweithiwr allweddol ar gyfer yr hyfforddiant hyrwyddwyr. Mae hyn yn golygu bod y cartref yn fwy cadarn o ran eu trosiant staff eu hunain ac mae'n eu helpu i gynnal cydymffurfiaeth, o gymharu â'r fformat hŷn, pan fyddai un aelod o staff enwebedig yn gyfrifol fel hyrwyddwr. Adolygwyd pecyn hyfforddiant y rhaglen i sicrhau ei fod yn fwy rhyngweithiol. Mae darluniau a storïau newydd wedi'u hychwanegu i ddiweddaru'r cyflwyniad PowerPoint. Mae cartrefi sydd wedi bod yn cymryd rhan yn Gwên am Byth ers blynnyddoedd lawer wedi gwerthfawrogi'r diweddariad, er mwyn gwella ymgysylltiad.

### Cwm Taf Morgannwg

Cafodd sesiynau hyfforddiant eu canslo'n aml drwy gydol y flwyddyn oherwydd problemau staffio mewn cartrefi gofal, a achoswyd gan lefelau uchel o salwch a throsiant staff. Mae'r tîm wedi cynnal cymysgedd o sesiynau hyfforddiant i hyrwyddwyr a hyfforddiant craidd, gyda llai wedi cymryd rhan yn yr hyfforddiant i hyrwyddwyr o gymharu â'r blynnyddoedd blaenorol. Datgelodd adborth nad oedd staff eisiau ymrwymo i fod yn hyrwyddwyr am nad oedd ganddynt ddigon o amser i ymgymryd â'r rôl ac am nad oeddent yn cael eu talu i ysgwyddo'r cyfrifoldeb ychwanegol.

### Hywel Dda

Yn dilyn y pandemig COVID-19, mae cartrefi gofal wedi cael anhawster i gadw staff, sydd wedi arwain at drosiant staff uchel. Collwyd hyrwyddwyr gofal y geg, felly ni fu'n bosibl darparu hyfforddiant mewnol i aelodau newydd o staff. Mae llwyth gwaith y staff sy'n weddill yn effeithio ar eu hargaeledd i fynychu sesiynau hyfforddiant. Mae hefyd yn golygu bod hyfforddiant Gwên am Byth yn cael ei ganslo ar y funud olaf. Mae'n ymddangos yn aml fod cartrefi gofal yn rhoi blaenoriaeth i fathau eraill o hyfforddiant. Mae tîm Gwên am Byth y GDC wedi gweithio'n agos gyda'r timau Gofal Tymor Hir ac roeddent yn siaradwyr gwadd mewn digwyddiad cartrefi gofal yn y Gerddi Botanegol Cenedlaethol, ochr yn ochr â disgyblaethau eraill. Yn dilyn y digwyddiad hwn, derbyniwyd ymholiadau a arweiniodd at rai cartrefi gofal yn ymgysylltu â'r rhaglen am y tro cyntaf.

## Powys

Mae'r tîm wedi parhau i wynebu llawer o rwystrau oherwydd prinder sylweddol o staff gofal, trosiant staff uchel (gan gynnwys newidiadau rheolaidd i'r rheolwyr), cartrefi'n cael eu cau dros dro oherwydd salwch a nifer gyfyngedig o wirfoddolwyr i fod yn 'Hyrwyddwyr' oherwydd pryderon ynghylch diffyg amser a dim tâl ychwanegol. Yn anffodus, mae'r rhwystrau hyn wedi arwain at gansio 39 o sesiynau hyfforddiant yn hwyr.

## 4. Sicrhau Ansawdd

Dylai staff Gwên Am Byth ymweld â chartrefi gofal sy'n cymryd rhan yn y rhaglen ddwywaith y flwyddyn, er mwyn sicrhau bod nodau'r rhaglen (a gyflwynir yn y cyflwyniad) yn cael eu cyflawni.

| <b>Tabl 3: Cofnod o ymweliadau Sicrhau Ansawdd</b> |                                                                                 |                                                                         |                                                           |
|----------------------------------------------------|---------------------------------------------------------------------------------|-------------------------------------------------------------------------|-----------------------------------------------------------|
| Bwrdd Iechyd Lleol                                 | Nifer y cartrefi gofal sydd wedi cael dim ond 1 ymweliad SA yn ystod y flwyddyn | Nifer y cartrefi gofal sydd wedi cael 2 ymweliad SA yn ystod y flwyddyn | Nifer y cartrefi gofal cymwys (yn ymwneud â Gwen Am Byth) |
| Aneurin Bevan                                      | 34                                                                              | 51                                                                      | 85                                                        |
| Bae Abertawe/<br>Swansea Bay                       | 0                                                                               | 80                                                                      | 80                                                        |
| Betsi Cadwaladr                                    | 0                                                                               | 103                                                                     | 109                                                       |
| Cwm Taf Morgannwg                                  | 44                                                                              | 5                                                                       | 56                                                        |
| Caerdydd a'r Fro/<br>Cardiff and Vale              | 0                                                                               | 0                                                                       | 17                                                        |
| Hywel Dda                                          | 14                                                                              | 0                                                                       | 44                                                        |
| Powys                                              | 2                                                                               | 11                                                                      | 13                                                        |

Yn ôl timau lleol, mae'r ffurflen Sicrhau Ansawdd newydd a gyflwynwyd eleni wedi sicrhau proses sy'n llawer mwy syml ar gyfer nodi anghenion hyfforddiant cartrefi gofal ac wedi darparu cyfle i sgwrsio â rheolwyr/ hyrwyddwyr cartrefi gofal ynghylch gofal y geg mewn mwy o fanylder.



## 5. Y tu hwnt i gartrefi gofal

### Aneurin Bevan

Ers mis Ebrill 2022, mae'r tîm wedi bod yn cyflwyno rhaglen Hanfodion Gwên am Byth. Maent wedi bod yn targedu a chyflenwi hyfforddiant wedi'i anelu at oedolion hŷn sy'n cael eu cefnogi i fyw gartref. Datblygwyd cysylltiadau partneriaeth newydd yn y tri ysbyty cymunedol (yn Sir Fynwy, Torfaen a Blaenau Gwent), yn ogystal â chysylltiadau gyda darparwyr gofal cartref yn y sectorau iechyd a gofal cymdeithasol preifat a chynghorau lleol. Mae pob un o'r sectorau gofal wedi croesawu'r hyfforddiant, ac wedi datgan bod ei angen. Mae'r adborth a dderbyniwyd wedi bod yn gadarnhaol iawn, gyda rhai darparwyr gofal preifat yn addasu eu cynlluniau gofal electronig yn awr i gynnwys asesiad gofal y geg a chynllun gofal y geg, ac maent wedi ymgorffori hyfforddiant gofal y geg fel rhan o'u hyfforddiant sefydlu ar gyfer aelodau newydd o staff. Fel rhan o'r gwaith hwn, mae arweinydd Gwên am Byth wedi bod yn ymwneud â hyfforddiant i bwysleisio gofal y geg ar gyfer pobl hŷn, er enghraifft gofal y geg i oedolion yn yr ysbyty, gan gynnwys gofal lliniarol, timau iechyd meddwl pobl hŷn, gofal dementia, dyddiau sefydlu ymarferwyr nyrsio cynorthwyol, dyddiau astudio Taith o Ragoriaeth a dyddiau astudio lleferydd ac iaith amlddisgyblaeth.

### Bae Abertawe

Cynhaliodd y tîm raglen beilot i ganfod a yw'r pecyn hyfforddiant Hanfodion Gwên am Byth yn cyflawni'r gofynion hyfforddiant ar gyfer darparwyr gofal cartref. Roedd y rhaglen beilot yn cynnwys chwe darparwr ac 85 aelod o staff gofal cartref. Derbyniwyd adborth cadarnhaol, gyda lefel uwch o werthfawrogiad o hyfforddiant (a hyfforddiant wyneb yn wyneb yn benodol) a chydabyddiaeth bod gofal y geg yn rhan hollbwysig o ofal personol. Dechreuodd llawer o ddarparwyr gofal ymgorffori'r asesiad risg gofal y geg yn ystod y diweddariadau gofal personol generig bob 3 mis a defnyddio cynlluniau gofal y geg ar gyfer defnyddwyr gwasanaeth. Cynhyrchwyd adroddiad gwerthuso ac adnodd gwybodaeth ategol. Darperir hyfforddiant hefyd i Nyrsys Ardal yn fisol. Darperir hyfforddiant tiwtoriaeth mewn ysbytai i nyrsys cyffredinol cofrestredig a Gweithwyr Cymorth Gofal Iechyd, gweithwyr gofal iechyd proffesiynol eraill a myfyrwyr nyrsio yn eu blwyddyn 1af a'u 2il flwyddyn ym mhrifysgol Abertawe.

### Caerdydd a'r Fro

Darparodd y tîm hyfforddiant i ddarparwr gofal cartref, a oedd yn awyddus iawn ac yn ddiolchgar am ein mewnbwn, ac mae 100 o weithwyr cymorth Gofal Iechyd wedi'u hyfforddi.

### Cwm Taf Morgannwg

Darparodd y tîm hyfforddiant Hanfodion Gwên am Byth ar gyfer y sector gofal cartref. Cynigiwyd hyfforddiant i lawer o wasanaethau cartref ar draws y bwrdd iechyd, gyda graddau amrywiol o ymgysylltiad yn ystod cyfnod o chwe mis. Bwriedir gwneud gwaith parhaus gyda'r sector hwn.

Darparwyd hyfforddiant gofal y geg yn rheolaidd ar gyfer y rhaglen Nyrsys Newydd Gymhwysol/ Nyrsys Rhyngwladol a darparwyd hyfforddiant gofal y geg ar wardiau ar draws pob safle ysbyty yn ardal Cwm Taf Morgannwg.

### Hywel Dda

Mae arweinwyr timau lleol Gwên am Byth, mewn cydweithrediad â'r tîm Dysgu a Datblygu ac arweinydd gofal y geg Gwelliant Cymru, wedi bod yn gweithio i ddatblygu adnodd hyfforddiant gofal y geg Cofnod Staff Electronig Cymru Gyfan. Bydd staff gofal y GIG yn gallu cwblhau hyn fel rhan o'u hyfforddiant E-ddysgu gorfodol. Mae'r tîm Gwên am Byth hefyd yn helpu i hyfforddi staff gofal ysbytai yn y ffyrdd canlynol: Sgiliau Gofalu: cyfnod o 2 awr ar raglen sefydlu i bob gweithiwr cymorth gofal iechyd newydd; darparwyd hyfforddiant i staff tiwtoriaeth; rhaglen Fframwaith Sefydlu Cymru Gyfan, sy'n targedu'r rhai sy'n ceisio cymhwyster i ofalu am yr henoed a phobl agored i niwed. Ymarferwyr Iechyd y Geg sy'n darparu'r hyfforddiant wyneb yn wyneb bob awr i'r tair sir yn fisol. Mae arweinydd y tîm a'r uwch swyddog hybu iechyd y geg wedi cwblhau eu gwobr Arian Gwella Ansawdd Gyda'n Gilydd. Bu ein harweinydd tîm yn canolbwyntio ei phrosiect ar becynnau "diwedd oes" ar gyfer y rhai sy'n cael eu rhyddhau o'r ysbyty naill ai i'w cartrefi eu hunain neu i gartref gofal. Croesawyd hyn a byddai o fudd i'r rhai â'r angen mwyaf. Mae'n ddarn o waith ar y cyd sy'n cynnwys nyrsys ardal peripatetig ac Iechyd Cyhoeddus Cymru.

## 6. Cyllideb a'r Gweithlu yn y Gwasanaethau Deintyddol Cymunedol

| <b>Tabl 4: Cyllideb</b>               |                                   |                                                                                     |
|---------------------------------------|-----------------------------------|-------------------------------------------------------------------------------------|
| Bwrdd Iechyd Lleol                    | Y gyllideb flynyddol a ddyrannwyd | Gwariant blynyddol y rhaglen: Costau staff a threuliau nad ydynt yn ymwneud â staff |
| Aneurin Bevan                         | 70,000                            | 96,402                                                                              |
| Bae Abertawe/<br>Swansea Bay          | 70,000                            | 70,375                                                                              |
| Betsi Cadwaladr                       | 157,704                           | 154,568                                                                             |
| Cwm Taf Morgannwg                     | 64,961                            | 64,961                                                                              |
| Caerdydd a'r Fro/<br>Cardiff and Vale | 48,000                            | 48,532                                                                              |
| Hywel Dda                             | 75,000                            | 75,000                                                                              |
| Powys                                 | 28,000                            | 28,000                                                                              |

Soniodd yr holl dimau lleol am faterion staffio yn eu timau bach Gwên am Byth yn y GDC. Roedd hyn yn cynnwys absenoldeb oherwydd salwch hirdymor, ymddiswyddiadau staff, oedi wrth recriwtio a'r angen am gyfnodau mentora gydag aelodau o staff newydd. Dywedodd rhai o'r timau eu bod yn ehangu capasiti staff a chwmpas y ddarpariaeth o ganlyniad i gyllid lleol i ategu'r rhaglen.

| <b>Tabl 5: Gweithlu</b>               |                                                                  |                                                                        |
|---------------------------------------|------------------------------------------------------------------|------------------------------------------------------------------------|
| Bwrdd Iechyd Lleol                    | Cyfanswm y Gweithlu Cyfwerth ag Amser Cyflawn (WTE) a ddyrannwyd | Nifer cyfartalog y sesiynau (hanner diwrnodau) yr wythnos a ddyrannwyd |
| Aneurin Bevan                         | 2.7*                                                             | 36.5                                                                   |
| Bae Abertawe/<br>Swansea Bay          | 1.6                                                              | 16                                                                     |
| Betsi Cadwaladr                       | 6.2                                                              | 31                                                                     |
| Cwm Taf Morgannwg                     | 1.16                                                             | 12                                                                     |
| Caerdydd a'r Fro/<br>Cardiff and Vale | 1.36                                                             | 20                                                                     |
| Hywel Dda                             | 2.4                                                              | 14                                                                     |
| Powys                                 | 0.6                                                              | 6                                                                      |

\*2.0WTE wedi'i ariannu gan y gyllideb GAB sydd wedi'i chlustnodi, 0.7WTE wedi'i ariannu gan gyllideb ehangach y GDC